

ASSERTIO II.

Sex vulgò dictæ conditiones Sapientiæ utrumque manifestè arguunt, quæ ita cohærent, ut ex prima reliquæ deduci possint.

§. 1. Qualis sit illa scientia, quam Sapientiam appellamus, circa quæ versetur, & utrum una illa sit, an verò plures, ut adhuc intelligatur melius, sex communes opiniones, quæ de Sapientia habentur, ab Aristotele recensentur, lib. 1. Met. c. 2. ita collecturo: Si omnes opiniones, quæ de Sapiente habentur, in unam cadunt scientiam una erit Sapientia, sin minus, plures erunt.

§. 2. Est autem *prima* de Sapiente opinio quod ille omnia sciat, à Sapiente siquidem omnium rerum cognitionem requirere solemus, sed non in particulari, sufficit enim in universali, quamvis utraq; cognitio conjuncta procul dubio sit melior quia v. Scire est rem per causam cognoscere, is maximè in universali omnia sciet, qui primas & communissimas rerum caussas & principia cognoscet, non dimittens se ad ad particulares rerum rationes.

§. 3. *Secunda opinio* de Sapiente est, ipsum scire ea, quæ hominibus sunt cognitu difficillima, de difficillimis enim Sapientiorem consulere consuevimus. Jam verò quæ sensui sunt obvia, illa sunt facillima, & talis cognitio omnibus hominibus, nisi aliquo sensu careant, est communis, quæ verò à sensu sunt remotissima, illorum scientia paucissimis competet, & talia erunt omnium difficillima. Sensui autem obvia sunt effectus, singularia & quidem mobilia. *Causæ itaq; primæ & communissimæ erunt remotissimæ,*